

Ito Dania

Rey di Tumba 1982 di Aruba

ORANJESTAD (AAN).--

Aruba tin su Rey di Tumba den persona di Ito Dania, kende ayera nochi dilanti di un publico grandi den club R.C.A., na Solito a conquista e titulo maximo di cantante di tumba cu "Hiep, Hiep Hoera!", un composicion di Martin Quandus.

Tabata e propio Martin Quandus cu a keda na di dos lugar cu su tumba "Waya bo brasa," mientras cu Chicho Kock a logra e tercer puesto cu "Ela pega."

E mihor arreglista tabata Franklin Granadillo, cu e tumba "Ela pega."

Henter e programa a desarolla rapido, ordena y manera a ser stipula, e concurso a finalisa algo prome cu 12'or, mientras cu e resultado a ser duna pa mas of menos 12.15, algo cu merece un palabra di elogio.

Mester apunta cu e aña aki caliber di e tumbanan tabata na un nivel halto, y tanto e gran cantidad di publico cu a asisti pa apoya nan favorito, como e miles di radioescuchas cu

a sigui e concurso via radio a goza inmensamente di un anochi alegre, yen di ambiente.

E Tumba contest di e aña aki a ser dedica na e "Inquieto" Juancho Kock, ganador di e evento pa cinco aña sigui, y kende na final a subi stage, pa alegria di e publico, y interpreta e tumba "Waak e," den su estilo unico. Un berdadero "jam session" a tuma lugar e ora ey, ora cu tur e cantantenan a rondona Juancho pa compaiele den e tumba, poniendo e publico zwaai na nan smaak.

Comentarionan cu a ser scucha di e participantenan ta cu nan a keda satisfecho cu seleccion di e jurado, dunando e titulo di Rey di Tumba na Ito Dania, kende por cierto aña pasa cu su tumba "Color y fantasia," tambe tabata hopi fuerte competidor.

DIARIO ta extende un caluroso pabien na Ito Dania, Martin Quandus y Chicho Kock como e mihor interpretenan di tumba di Aruba. Pabien na SAC tambe pa e bon organizacion.



Hiep Hiep Hoera pa Ito Dania, Rey di Tumba di Aruba 1982. Pa Ito esaki tabata un dobbel celebracion ya cu tabata su cumpleaños ayera tambe. Aki nos por mira un radiante Rey di Tumba di Aruba 1982 cu e trofeo di SAC y e copa rotativa obsequia pa Gobierno di Aruba.



Ambiente y mas ambiente den club R.C.A., na Solito. Un publico cu a anima su favoritonan na un manera bullicioso pero ordena, gozando di tur e interpretacionnan. Un publico cu a comporta su mes ehemplarmente y cu na final a acepta e tumba ganador cantando "Hiep, Hiep Hoera," cu mas a animo y den un solo voz.